



Adresa: **Ul. H. Čemerlića 39**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-1 /21-1-40-211-3/22**

Datum: **24.05.2022. godine**

«Agencija za vodno područje rijeke Save» Sarajevo rješavajući po zahtjevu «Agencije za vodno područje rijeke Save» Sarajevo podnesenom putem „Sektora za realizaciju investicionih projekata“, za izdavanje prethodne vodne saglasnosti za obezbjeđenje proticajnog profila rijeke Bosne na potezu most u Krivoglavcima – petlja Butile na sarajevskoj zaobilaznici u približnoj dužini oko 6.550 m, u općinama Vogošća i Novi Grad Sarajevo, na osnovu člana 109. stav (1) tačka 14., a u vezi sa članom 81. stav (1) Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99) **donosi**

RJEŠENJE **o prethodnoj vodnoj saglasnosti**

1. Investitoru, «Agenciji za vodno područje rijeke Save» Sarajevo daje se prethodna vodna saglasnost za obezbjeđenje proticajnog profila rijeke Bosne na potezu most u Krivoglavcima – petlja Butile na sarajevskoj zaobilaznici, u približnoj dužini oko 6.550 m, u općinama Vogošća i Novi Grad Sarajevo, u cilju poboljšanja uslova tečenja i sprječavanja štetnog djelovanja voda.
2. Prethodna vodna saglasnost se daje na osnovu pregleda dokumentacije dostavljene uz zahtjev i pod slijedećim uslovima:
 - 2.1. Izraditi investiciono - tehničku dokumentaciju na nivou potrebnom za pribavljanje odobrenja za izvođenje radova u skladu sa propisima koji važe za ovu vrstu radova, a koja treba da je urađena od strane ovlaštenog pravnog lica u skladu sa odredbama Pravilnika o uvjetima i kriterijima koje mora ispunjavati pravno lice za izradu dokumentacije na osnovu koje se izdaju vodni akti („Službene novine Federacije BiH“, broj 17/08 i 38/12).
 - 2.2. Projektnom dokumentacijom treba dati tehničko – ekonomski optimalno rješenje čišćenja i uređenja korita rijeke Bosne u cilju sprječavanja/umanjenja štetnog djelovanja voda i poboljšanja hidromorfološkog stanja vodotoka i dinamike prirodnog procesa tečenja na lokalitetu navedenom u tački 1. Rješenja i da sadrži, uz sve ostale priloge općeg karaktera, slijedeće:
 - Situativni prikaz sa ucrtanom dionicom obuhvaćenom aktivnostima uređenja i čišćenja korita rijeke Bosne sa odgovarajućom legendom i pojašnjenjima, na ažurnim geodetskim podlogama (ne starija od tri mjeseca), kao i uzdužnim i poprečnim profilima riječnog korita urađenim na bazi geodetskih snimanja, koja će se provesti za potrebe izrade ove projektne dokumentacije. Snimanje izvesti preko operativnog poligonog vlaka uz povezivanje sa državnim nivelmanom sa osiguranjem krajnjih tačaka poprečnih profila na terenu trajnim biljegama (uz položajni opis i nacrt), preko kojih će se vršiti kontrola realizacije ovih radova;
 - Na razmaku od prosječno 50 m ili na kraćem rastojanju snimiti i u odgovarajućoj razmjeri prikazati poprečne profile sa stabiliziranjem i obilježavanjem bočnih tačaka, sa dovoljnom dužinom u zaobalju, te dovoljnim brojem tačaka u koritu rijeke Bosne;
 - Geometrijske karakteristike korita (širina, dubina, osočina i sl.), njegov položaj i veličinu treba usaglasiti sa prirodnim stanjem korita i uskladiti sa projektnom dokumentacijom regulacije ove dionice rijeke Bosne i dati odgovarajuća obrazloženja;
 - Sa ribolovnim društvom, koje je korisnik ribolovnog prava na ribolovnom području na kome se provode navedene aktivnosti, usaglasiti vremenski period u kojem je moguće izvođenje radova na uklanjanju nanosa iz korita vodotoka, vodeći računa o periodu mriještenja plemenite ribe, te utvrditi dinamiku izvođenja radova;
 - Zahvati na čišćenju korita moraju uvažiti postojeće imovinsko - pravne odnose i radove svesti u pojas kojim će se najmanje narušiti privatni posjedi i parcele, uvažavajući pri tome i pristup lokalitetu na kome će se radovi izvoditi;
 - Predmjerom radova utvrditi količine materijala (pijesak, šljunak) koje će se izvaditi prilikom izvođenja radova, a koji se može dalje koristiti, te materijala koji treba ukloniti (smeće, mulj, kruti otpad, pijesak, šljunak, šibljie i dr). Bilans masa uraditi na osnovu ažurnih geodetskih podloga;

- U zavisnosti od utvrđenog kvaliteta i količine izvađenog materijala, definisati mjesto njegovog odlaganja, odnosno daljeg korištenja;
- Utvrditi moguće uticaje na druge objekte i postrojenja, korito vodotoka, površinske i podzemne vode, stečena prava korisnika i sl. i mjere za ublažavanje tih uticaja;
- Zahvati uređenja korita trebaju se uklopiti u postojeći ambijent sa minimalnim narušavanjem prirodnog stanja koristeći u rješenju prirodne materijale;
- Prilikom definiranja načina izvođenja radova na predmetnom lokalitetu, uvažiti postojeće stanje korita, morfologiju terena, geološki sastav korita, sigurnosni aspekt i sl.;

Projektna dokumentacija treba da bude urađena na zakonski zahtijevanom nivou za ovu vrstu radova i sadrži sve opće i tehničke elemente propisane zakonodavstvom iz ove oblasti.

3. Višak materijala koji ima svoju upotrebnu i tržišnu vrijednost i koji se može dalje koristiti (pijesak, šljunak) koji će se pojaviti kod čišćenja korita rijeke Bosne i čije će se količine utvrditi u predmjeru radova iz tačke 2.2. alineja 5. ovog dispozitiva, treba obuhvatiti Ugovorom u skladu sa odredbama člana 19. stav (2) i (3) Uredbe o načinu dodjele prava za vađenje materijala iz vodotoka («Službene novine Federacije BiH», broj 58/15).
4. Po izradi dokumentacije iz tačke 2.1. dispozitiva ovog Rješenja, nosilac prava iz prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti. Zahtjev za izdavanje vodne saglasnosti dostavlja se u skladu sa članom 8. i 19. Pravilnika o sadržaju, obliku, uslovima, načinu izdavanja i čuvanja vodnih akata.

Uz zahtjev se, između ostalog, prilaže:

- Investiciono - tehnička dokumentacija zahtijevana tačkom 2.1. ovog Rješenja,
 - Rješenje o urbanističkoj saglasnosti i okolinskoj dozvoli (ukoliko predmetna aktivnost podliježe obavezi pribavljanja iste) za predmetnu dionicu uređenja rijeke Bosne,
 - Saglasnost nadležnog udruženja ribolovaca na termine provođenja radova na predmetnom potezu korita rijeke Bosne,
 - Podatke o planiranom mjestu ugradnje upotrebljivog materijala izvađenog iz vodotoka kao i mjestu deponovanja za materijal koji nema upotrebnu vrijednost (mulj, smeće, granje, humus i sl.),
 - Validne dokaze o riješenim pitanjima imovinsko-pravnih odnosa na prostoru na kome će se izvoditi radovi, te na trasi pristupnog puta do lokacije vađenja materijala iz vodotoka.
5. Ukoliko nakon izdavanja prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, u roku utvrđenom u članu 111. stav (3) Zakona o vodama, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu agenciju, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
 6. Ovu prethodnu vodnu saglasnost će Investitor koristiti u postupku dobijanja urbanističke saglasnosti i okolinske dozvole ukoliko ova vrsta radova podliježe obavezi ishodovanja istih i ona definiše uslove koje projektna dokumentacija treba zadovoljiti sa aspekta voda u skladu sa Zakonom o vodama u postupku dobijanja vodne saglasnosti.
 7. Prethodna vodna saglasnost se daje sa rokom važenja od tri (3) godine od dana pravosnažnosti ovog rješenja.

O b r a z l o ž e n j e

Investitor «Agencija za vodno područje rijeke Save» Sarajevo putem "Sektora za realizaciju investicionih projekata" Agencije je podnio zahtjev za izdavanje prethodne vodne saglasnosti za aktivnost obezbjeđenja proticajnog profila rijeke Bosne na potezu most u Krivoglavicima – petlja Butile na sarajevskoj zaobilaznici, u približnoj dužini oko 6.550 m, u općinama Vogošća i Novi Grad Sarajevo, u cilju poboljšanja uslova tečenja.

Uz zahtjev je dostavljena i pregledana slijedeća dokumentacija:

- Kopija Aktuelnog izvoda iz sudskog registra Općinskog suda u Sarajevu, broj: 065-0-RegZ-14-002716 od 21.04.2014. godine izdato od strane Općinskog suda u Sarajevu,
- Kopija obavještenja o razvrstavanju pravnog lica prema klasifikaciji djelatnosti, broj: 07-32.5-45391/12 od 11.12.2012. godine, služba za statistiku za područje Kantona Sarajevo,

- Kopija uvjerenja o poreznoj registraciji, Porezna uprava FBiH - Kantonalni porezni ured Sarajevo, od 14.12.2012,
- „Elaborat: Obezbjedenje proticajnog profila rijeke Bosne na potezu most u Krivoglavcima – petlja Butile na sarajevskoj zaobilaznici u općinama Vogošća i Novi Grad Sarajevo, urađena od strane „HYDRO CONTROL“ d.o.o. Sarajevo, mart 2022. godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i člana 21. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19 i 41/20) o zahtjevu je dana 10.05.2022. godine obaviještena javnost putem obavještenja na oglasnoj ploči «Agencije za vodno područje rijeke Save» Sarajevo, te dana 11.05.2022. godine u dnevnom glasilu „OSLOBOĐENJE“. U datom roku nije bilo pisanih izjašnjenja o predloženim aktivnostima iz zahtjeva.

U provedenom postupku konstatovano je slijedeće:

Predmetna aktivnost obrađena je projektnom dokumentacijom: „Elaborat: Obezbjedenje proticajnog profila rijeke Bosne na potezu most u Krivoglavcima – petlja Butile na sarajevskoj zaobilaznici u općinama Vogošća i Novi Grad Sarajevo, urađena od strane „HYDRO CONTROL“ d.o.o. Sarajevo, mart 2022. godine.

Navedena aktivnost je planirana važećim Planom i finansijskim planom za 2021. godinu AVP Sava, pod oznakom B.2.2.2. i B.2.2.12..

Procijenjeno je, prema dostavljenom Elaboratu, da na predmetnim dionicama vodotoka (ukupno cca $L=6557.76$ m) treba ukloniti približno 132.127 m³ materijala iskopom nanosa, odnosno ukloniti šibljje i nisko rastinje i urediti korito površine približno 65.578 m², odnosno provesti aktivnosti na održavanju prirodnog vodotoka kako je propisano članom 81. stav (1) Zakona o vodama. Ovim radovima se neće obezbijediti zaštita od plavljenja prostora izloženih uticaju velikih voda rangapojave $Q_{1/20}$ i $Q_{1/100}$ nego će se samo poboljšati uslovi tečenja u prirodnom stanju i ukloniti prepreke nastale prirodnim i procesima izazvanih antropogenim aktivnostima.

Čišćenje korita i uklanjanje vegetacije (drveće, šibljje) izvršiti na način da se ne pospješuje erozioni procesi.

Na osnovu priloženog elaborata u kome je utvrđena potreba za čišćenjem korita rijeke Bosne, na predmetnom lokalitetu u svrhu održavanja proticajnog profila, u dispozitivu ovog rješenja su utvrđeni uvjeti kojima mora udovoljiti dokumentacija na osnovu koje će se pokrenuti postupak za izdavanje vodne saglasnosti za čišćenje vodotoka, a sve u skladu sa članom 111. stav (1) Zakona o vodama.

Na osnovu prednjeg i provedenog postupka, a shodno članu 109. stav (1) tačka 14., a u vezi sa članom 81. stav (1) Zakona o vodama, doneseno je rješenje kao u dispozitivu ovog rješenja.

UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.

Obrađivač akta: Aida Bezdrob, dipl.inž.građ.

Prilog:

Elaborat: Obezbjedenje proticajnog profila rijeke Bosne na potezu most u Krivoglavcima – petlja Butile na sarajevskoj zaobilaznici u općinama Vogošća i Novi Grad Sarajevo.

Po ovlaštenju
Rukovodilac sektora za
izdavanje vodnih akata



Haris Ališehović, dipl.inž.građ.

Dostaviti:

- «Agencija za vodno područje rijeke Save», Sektor 30 (sa prilogom);
- AVP Sava, ISV-vodna knjiga – ovdje
- Arhiva – ovdje
- AVP Sava – Oglasna ploča